

Mundialmente menos hende ta scoge pa e trabao di maestro

Directora di IPA ta confirma cu tin escasez di maestro, pero no ta solamente na Aruba



ORANJESTAD (AAN): drs. Marilyn Richardson, directora di Instituto Pedagógico Arubano (IPA) ta masha contento cu e inicio di e aña escolar 2019-2020.

El a bisa cu nan ta habriendo e aña cu dos klas di enseñanza primario y un grupo nobo ta cuminzando cu e opleiding di Hulandes como idioma stranhero.

El a expresa cu nan tabata hopi contento di por a ricibi tur e studiantenan nobo y tur esnan cu a bin bek despues di vakantie. Awor ta pasando den un siman di introduccion pa cuminza cu e lesnan otro siman.

Marilyn Richardson a confirma cu tin un escasez di maestro, pero esaki no ta solamente na Aruba. E trabao di maestro ta un trabao cu a bira menos interesante den mundo. Mundialmente ta wak cu menos hende ta scoge pa e trabao di maestro di scol, “siendo cu e ta e trabao di mas bunita cu ta existi (...) aunke e ta birando mas pisa”, a expresa.

E docente a laga sa cu nan no a haci un encuesta,

pero nan a ripara cu tabata tin hende interesa pero no tur ta logra drenta den e opleiding. E ta un trabao cu ta rekeri hopi y esey ta pone cu tin un manera di traha cu e grupo prome cu nan cuminza pa asina por ta sigur cu locual a inicia tambe por caba, a indica.

Tin testnan cu e candidatonan ta haci. E interes tey. El a baha compara cu un par di aña pasa, unda antes rond di 100 awor a baha pa 70 persona interesa, a indica. Pa loke ta e resultadonan, Richardson a duna di conoce cu e ultimo aña nan a gradua hopi docente. Dos aña pasa e cantidad tabata ariba 80. Aña pasa tabata 54 durante full e aña, pa diferente opleiding.

Di esnan cu ta drenta semper tin un grupo cu ta cay afo pa diferente motibo. Pero un bes cu nan pasa e prome aña tin un chens basta grandi cu nan por caba. E opleiding ta dura den total 4 aña, pero IPA ta duna un espacio di 6 aña pa por finaliza e estudio, drs. Richardson a señala.